

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ՆԵՐՔԻՆ ԳՈՐԾԵՐԻ ՆԱԽԱՐԱՐՈՒԹՅԱՆ ԿՐԹԱՀԱՄԱԼԻՐԻ  
ԳԻՏԱԿԱՆ ԽՈՐՀՈՒՐԴ**

**Ո Ր Ո Շ ՈՒ Մ**

**21 ապրիլի 2025 թվականի № 9**

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՆԵՐՔԻՆ ԳՈՐԾԵՐԻ ՆԱԽԱՐԱՐՈՒԹՅԱՆ  
ԿՐԹԱՀԱՄԱԼԻՐԻ ՍՈՎՈՐՈՂՆԵՐԻՆ ԱՆՎԱՆԱԿԱՆ ԿՐԹԱԹՈՇԱԿՆԵՐԻ ՀԱՏԿԱՑՄԱՆ  
ԿԱՐԳԸ ՀԱՍՏԱՏԵԼՈՒ ԵՎ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՈՍՏԻԿԱՆՈՒԹՅԱՆ  
ԿՐԹԱՀԱՄԱԼԻՐԻ ԳԻՏԱԿԱՆ ԽՈՐՀՐԴԻ 2013 ԹՎԱԿԱՆԻ ՀՈԿՏԵՄԲԵՐԻ 30-Ի ԹԻՎ 21-  
ՐԴ ՆԻՍՏՈՒՄ ՀԱՍՏԱՏՎԱԾ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՆԵՐՔԻՆ ԳՈՐԾԵՐԻ  
ՆԱԽԱՐԱՐՈՒԹՅԱՆ ԿՐԹԱՀԱՄԱԼԻՐԻ ՍՈՎՈՐՈՂՆԵՐԻ ԱՆՎԱՆԱԿԱՆ  
ԿՐԹԱԹՈՇԱԿՆԵՐԻ ՀԱՏԿԱՑՄԱՆ ԿԱՐԳՆ ՈՒԺԸ ԿՈՐՑՐԱԾ ՃԱՆԱԶԵԼՈՒ ՄԱՍԻՆ**

Ղեկավարվելով Հայաստանի Հանրապետության կառավարության 2024թ. դեկտեմբերի 12-ի N 1989-Ն որոշմամբ հաստատված «Հայաստանի Հանրապետության ներքին գործերի նախարարության կրթահամալիր» պետական ոչ առևտրային կազմակերպության կանոնադրության 52-րդ կետի 17-րդ ենթակետով և 61-րդ կետի 8-րդ ենթակետով՝ Հայաստանի Հանրապետության ներքին գործերի նախարարության կրթահամալիրի գիտական խորհուրդը **որոշում է՝**

1. Հաստատել Հայաստանի Հանրապետության ներքին գործերի նախարարության կրթահամալիրի սովորողներին անվանական կրթաթոշակների հատկացման կարգը՝ համաձայն հավելվածի:

2. Ուժը կորցրած ճանաչել Հայաստանի Հանրապետության ոստիկանության կրթահամալիրի գիտական խորհրդի 2013 թվականի հոկտեմբերի 30-ի թիվ 21-րդ նիստում հաստատված Հայաստանի Հանրապետության ներքին գործերի նախարարության կրթահամալիրի սովորողների անվանական կրթաթոշակների հատկացման կարգը:

3. ՀՀ ՆԳՆ կրթահամալիրի ոստիկանական ուսումնական ստորաբաժանման սովորողները շարունակում են ստանալ հաստատված անվանական կրթաթոշակները 2024-2025 ուսումնական տարվա երկրորդ կիսամյակում:

**ՀՀ ՆԳՆ ԿՐԹԱՀԱՄԱԼԻՐԻ ՌԵԿՏՈՐԻ  
ԺԱՄԱՆԱԿԱՎՈՐ ՊԱՇՏՈՆԱԿԱՏԱՐ,  
ԻՆՔԸ ԵՎ ՀՀ ՆԳՆ ԿՐԹԱՀԱՄԱԼԻՐԻ  
ԳԻՏԱԿԱՆ ԽՈՐՀՐԴԻ ՆԱԽԱԳԱՀ**

**Մ.ՄՈՒՐԱԴՅԱՆ**

Ք. ԵՐԵՎԱՆ

## **Կ Ա Ր Գ**

Հայաստանի Հանրապետության ներքին գործերի նախարարության կրթահամալիրի սովորողներին անվանական կրթաթոշակների հատկացման

### **I. ԸՆԴՀԱՆՈՒՐ ԴՐՈՒՅԹՆԵՐ**

1. Հայաստանի Հանրապետության ներքին գործերի նախարարության կրթահամալիրի (այսուհետ՝ Կրթահամալիր) սովորողներին անվանական կրթաթոշակների (այսուհետ՝ կրթաթոշակ) հատկացման կարգը (այսուհետ՝ կարգ) սահմանում է Կրթահամալիրի՝ ոստիկանությունում և փրկարար ծառայությունում պաշտոնի նշանակվելու նպատակով իրականացվող՝ բակալավրիատի և միջնակարգ կրթության հիմքով միջին մասնագիտական կրթական ծրագրերով առկա անվճար ուսուցման սովորողներին կրթաթոշակների հատկացման կարգը և պայմանները:

### **II. ԿՐԹԱԹՈՇԱԿՆԵՐԻ ՀԱՏԿԱՑՄԱՆ ԿԱՐԳՆ ՈՒ ՊԱՅՄԱՆՆԵՐԸ**

2. Կրթահամալիրն իրավասու է սեփական և Հայաստանի Հանրապետության օրենսդրությամբ չարգելված այլ միջոցների հաշվին սահմանելու կրթաթոշակներ:

3. Կրթաթոշակի անվանումը, աղբյուրը, ֆոնդը և սովորողների ցուցակը հաստատում է Կրթահամալիրի գիտական խորհրդը:

4. Կրթաթոշակ նշանակվում է Կրթահամալիրի՝ ոստիկանությունում և փրկարար ծառայությունում պաշտոնի նշանակվելու նպատակով իրականացվող՝ բակալավրիատի և միջնակարգ կրթության հիմքով միջին մասնագիտական կրթական ծրագրերով առկա անվճար ուսուցման այն սովորողներին, ովքեր նախորդ ուսումնական տարվա քննաշրջաններին ստացել են գերազանց գնահատականներ, ցուցաբերել են կարգապահություն և հասարակական ակտիվություն:

5. Կրթաթոշակի հավակնորդ սովորողների թեկնածությունները քննարկում են ոստիկանական, փրկարար ծառայության և ճգնաժամային կառավարման ուսումնական ստորաբաժանումների խորհուրդներում, վերջիններիս վերաբերյալ հիմնավորված եզրակացությունները ներկայացվում են Կրթահամալիրի ուսումնական գործընթացի կազմակերպման, վերահսկման և շարունակական կրթության ապահովման բաժին:

6. Կրթաթոշակի հավակնորդների ցուցակը ուսումնական գործընթացի կազմակերպման, վերահսկման և շարունակական կրթության ապահովման բաժինը ներկայացնում է Կրթահամալիրի գիտական խորհրդի հաստատմանը: Կրթահամալիրի գիտական խորհուրդը բաց քվեարկությամբ, ձայների պարզ մեծամասնությամբ

հաստատում է այն, որի հիման վրա Կրթահամալիրի ռեկտորը տալիս է համապատասխան հրաման:

7. Կրթաթոշակների տրամադրումը վերանայվում է յուրաքանչյուր կիսամյակի սկզբում:

8. Ուսումնական տարվա ընթացքում կարգապահական խախտման համար տույժի ենթարկված սովորողին կրթաթոշակի հատկացումը դադարեցվում է Կրթահամալիրի ռեկտորի հրամանով: